



**AKADEMIA
EVOLUCION**
PRISHTINË

AKADEMIA EVOLUCION | EVOLUCION ACADEMY
Str. "Shefqet Shkupi", nn, Prishtinë 10000
+383 (0) 38 558 600 | www.akademiaevolucion.com

AKADEMIA "EVOLUCION"



Nr. 2857/1 dt. 21.02.2020

STATUTI

Prishtinë
2020

Në pajtim me dispozitat e Ligjit nr. 04/L037 për Arsimin e Lartë të Republikës së Kosovës, aktet tjera juridike të Ministrisë së Arsimit, Shkencës dhe Teknologjisë (MASHT), me të cilat rregullohet Arsimi i lartë në Republikën e Kosovës, Bordi i Drejtorëve (në tekstin e mëtejshëm: "BiD") i Akademisë "Evolucion" në takimin e mbajtur në Prishtinë më 26.11.2018 miratoi si vijon:

STATUTI

I AKADEMISË "EVOLUCION"

I. Dispozitat e përgjithshme

Neni 1

Statuti i Akademisë "Evolucion" (në tekstin e mëtejshëm: "Statuti") rregullon misionin, qeverisjen, veprimtarinë dhe punën e Akademisë "Evolucion". Ky Statut poashtu rregullon organizimin, autorizimet dhe mënyrën e vendosjes së organeve të Akademisë "Evolucion", zhvillimin e studimeve, statusin e personelit akademik, administrativ dhe të studentëve, çështjen e marrjes së masave dicitinore dhe çështje të tjera të rëndësishme për Akademinë "Evolucion".

Neni 2

Akademia "Evolucion" është bartës privat i arsimit të lartë në Kosovë, i cili organizon dhe zhvillon studime të larta profesionale dhe veprimtari komerciale në lëminë e arteve të aplikuara dhe dizajnit.

Selia, struktura dhe simbolet

Neni 3

Selia e Akademisë "Evolucion" është në adresën: Lagja Kalabria, rruga "Shefqet Shkupi", p.n., 10000 Prishtinë.

Neni 4

Akademia "Evolucion" përbëhet nga departamentet dhe njësitë tjera organizative, siç parashihet më tej në këtë Statut.

Neni 5

Akademia "Evolucion" ka stemën, vulën dhe vulën e thatë.
Formën e stemës së Akademisë "Evolucion" e zgjedhë Bordi i Drejtorëve i Akademisë "Evolucion" (më tej: Bordi i Drejtorëve) me vendim të veçantë.

Vula dhe vula e thatë kanë formën e rrumbullakët dhe në mes kanë stemën e Akademisë "Evolucion".

Akademia "Evolucion" ka përvjetorin e tij. Data e këtij përvjetori është 14.09.2005 (data e mbajtjes së mbledhjes themeluese të Akademisë "Evolucion").

Misioni i Akademisë "Evolucion"

Neni 6

Misioni i Akademisë "Evolucion" është t'iu mundësojmë studentëve tanë të zhvillohen dhe të bëhen profesionistë të suksesshëm dhe pjesëtarë aktivë e të dobishëm për komunitetin, përmes një procesi efikas të mësimdhënies, ushtrimeve praktike dhe projekteve hulumtuese e kreative në lëminë e arteve të aplikuara dhe dizajnit.

Akademia "Evolucion" ndihmon studentët jo vetëm në avancimin e artit por edhe krijimtarisë njerëzore, si dhe formimin e një komuniteti lider të artistëve dhe profesionistëve.

Këtë synim e arrijmë përmes zbatimit të teknikave dhe të metodologjive bashkëkohore të mësimdhënies si dhe komunikimit interaktiv midis studentëve, stafit të Akademisë "Evolucion", bizneseve si dhe akterëve të tjerë të jashtëm..

Objektivat kryesorë të Akademisë "Evolucion" janë:

- Të afirmohet si institucion i vlerësuar i arsimit të lartë në Kosovë dhe më gjerë, i njohur për zhvillimin dhe avancimin e ideve të reja krijuese, ideve shkencore dhe arsimit të gjithmbarshëm;
- Të zhvillojë dhe të zgjerojë vazhdimisht veprimtarinë e vet mësimore në përputhje me standardet bashkëkohore në fushën e arsimit të lartë profesional;

- Të arrijë nivel sa më të lartë profesional të arsimit të specialistëve në fushën e artit aplikativ, dizajnit, shkencës dhe kulturës nëpërmjet të një procesi të gjithanshëm të mësimdhënies, hulumtimeve, aktiviteteve artistike dhe projekteve kreative;
- T'i ofrojë tregut vendor dhe të rajonit profesionistë të kualifikuar në fushën e arteve të aplikuara dhe dizajnit në pajtim me zhvillimet ekonomike rajonale dhe më gjerë;
- Të ushtrojë veprimtari komerciale në lëminë e arteve të aplikuara dhe dizajnit;
- Të ndihmojë në avancimin dhe forcimin e pozitës së gruas në shoqëri;
- Të forcojë vetëdijen e përgjegjësisë sociale të stafit dhe studentëve dhe të vazhdojë të jetë kontribues i rëndësishëm në aktivitetet me interes të komunitetit.

Neni 7

Personeli i Akademisë "Evolucion" dhe studentët gëzojnë lirinë e organizimit dhe të tubimit në pajtim me ligjet në fuqi, Statutin dhe aktet tjera të Akademisë "Evolucion".

Neni 8

Akademia "Evolucion" ofron mundësi të barabarta për të gjithë, pa diskriminim në bazë gjinie, race, religjioni, besimi politik, përkatësie kombëtare, etnike ose sociale, pasurie, statusi të lindjes apo ndonjë statusi tjetër.

Neni 9

Akademia "Evolucion" gëzon liri akademike dhe autonomi organizative dhe financiare.

Liria akademike në mësimdhënie nënkupton respektimin e shumëllojshmërisë së opinionëve, ideve e metodave dhe garantimin e zhvillimit të lirë, kritik e krijues të mësimdhënies e të kërkimit profesional. Kjo liri akademike ushtrohët në përputhje me planet dhe programet mësimore të miratuara për të gjitha degët e studimeve që ka Akademia "Evolucion".

Në kuadrin e autonomisë organizative e financiare, Akademisë "Evolucion" i njihet e drejta e vendosjes së marrëdhënieve me institucione të arsimit të lartë të vendit dhe të huaja, e drejta e anëtarësimit në shoqata e organizata kombëtare dhe ndërkombëtare të arsimit të lartë, e drejta e

bashkëveprimet me fondacione vendase e të huaja që ndihmojnë në zhvillimin e arsimit të lartë, e drejta e disponimit të mjeteve sipas ligjit në fuqi, e drejta e administrimit të pasurisë, e drejta e përzgjedhjes së organeve drejtuese të departamenteve, e drejta e emërimit të personelit të Akademisë "Evolucion", e miratimit të të gjitha rregulloreve të mbrendshme të Akademisë "Evolucion", e miratimit të planeve dhe programeve mësimore, e përcaktimit të modalitetëve të pranimit të studentëve të rinj.

Neni 10

Akademia "Evolucion" është person juridik dhe gëzon të drejtat dhe obligimet nga ky kontekst, duke përfshirë edhe:

- të drejtën për të paditur dhe të drejtën për t'u paditur;
- të drejtën të përdorë vulën dhe emblemat tjera;
- të drejtën të kufizojë përdorimin e titullit të saj vetëm për personat dhe organizatat që e kanë autorizimin e saj.

Neni 11

Të gjitha mjediset (ndërtimet dhe trojet) që janë në administrim të Akademisë "Evolucion", si dhe çdo mjedis i fituar në mënyrë të ligjshme në të ardhmen, gëzojnë paprekshmërinë. Kjo paprekshmëri përfshinë mosndërrhyrjen në mjediset e Akademisë "Evolucion" të çdo personi fizik dhe juridik (shtetëror apo privat), mosndërrhyrjen e pushtetit dhe organeve të rendit pa lejen apo kërkesën e Drejtorit Ekzekutiv të Akademisë "Evolucion" (më tutje: Drejtori Ekzekutiv) ose personit të autorizuar prej tij.

Përfundimisht, për rastet e kryerjes së një krimi të rëndë dhe në rastet e fatkeqësisë natyrore, ndërhyrja e forcave të policisë dhe rendit mund të bëhet edhe pa lejen e Drejtorit Ekzekutiv.

Për çdo cenim të paprekshmërisë, Akademia "Evolucion" ka të drejtë të denoncimit të shkeljes dhe ndëshkimit të shkelësve sipas dispozitave ligjore.

II. Struktura organizative

Neni 12

Akademia "Evolucion" përbëhet prej:

1. Njësive akademike dhe
2. Administratës (Njësive organizative).

Neni 13

Njësitë akademike ose organizative nuk kanë subjektivitet juridik

1. Njësitë akademike

Neni 14

Njësitë akademike të Akademisë "Evolucion" janë:

1. Departamenti i Dizajnit të Modës,
2. Departamenti i Dizajnit të Komunikimit dhe
3. Departamenti i Dizajnit të Enterierit.

Në të ardhmen mund të themelohën edhe njësi tjera akademike.

Neni 15

Njësitë akademike kanë status të njëjtë sipas dispozitave që rregullojnë organizimin në këtë Statut.

Neni 16

Çdo njësi akademike ka emrin e vet.

Njësia akademike mbanë emblemën dhe emrin e Akademisë "Evolucion" brenda emblemës si dhe emrin e vet.

Neni 17

Njësitë akademike, në përputhje me madhësinë e vet, me numrin e përgjithshëm të personelit akademik, numrin e mësimdhënësve sipas fushave akademike si dhe përqindjen e personelit të përhershëm, duhet të plotësojnë standardet ndërkombëtare në fushën e arsimit të lartë profesional, në mënyrë që të sigurojnë zhvillim të qëndrueshëm dhe veprimtari profesionale në fushat përkatëse për një periudhë afatgjatë.

Bordi i Drejtorëve i Akademisë "Evolucion" nxjerr rregullore mbi organizimin e mbrendshëm të njësisve akademike me propozim të departamenteve përkatëse.

Neni 18

Çdo departament është përgjegjës:

- të organizojë mësimdhënien, provimet dhe vlerësimin e studentëve;
- të sigurojë cilësinë, vlerësimin si dhe të raportojë përkitazi me këto çështje në pajtim me këtë Statut;
- të rregullojë çështjet e personelit sipas dispozitave të këtij Statuti;
- t'i paraqesë propozime dhe kërkesa Këshillit Akademik të Akademisë "Evolucion" përkitazi me çështjet akademike dhe ato që kanë të bëjnë me lëndët që ligjërohen në departament;
- të zhvillojë projekte apo krijimtari të shkathtësisë sipas standardeve ndërkombëtare;
- të përdorë drejt dhe në mënyrë efektive mjetet, siç është paraparë me këtë Statut.

Neni 19

Çdo departament udhëheqet nga Udhëheqësi i tij.

Udhëheqësit e departamenteve zgjedhen/emërohen nga Drejtori Ekzekutiv për një periudhë dyvjeçare dhe duhet të posedojnë aftësi dhe përvojë në udhëheqje.

Neni 20

Udhëheqësi i departamentit mund të zëvendësohet para kohe në rast të:

1. dorëheqjes;
2. shkarkimit;

3. arësyeve shëndetësore;
4. dënimit për vepër penale;
5. vdekjes.

Procedura për shkarkimin e përgjegjësit mund të inicohet nga:

1. Bordi i Drejtorëve;
2. Këshilli Akademik;
3. Drejtori Ekzekutiv;
4. Departamenti përkatës.

Procedura për shkarkimin e Udhëheqësit të Departamentit përcaktohet me rregulloret e nxjerra nga Këshilli Akademik i Akademisë "Evolucion" si dhe në përputhje me aktet dhe kontratat në fuqi.

Neni 21

Udhëheqësi i Departamentit i përgjigjet Drejtorit Akademik. Detyrat dhe përgjegjësitë e tij janë:

- të sigurojë udhëheqje akademike në fushat përkatëse për zhvillimin e mësimit, punës mësimore, kërkimore dhe artistike në Departament;
- të ndërmerr masa të nevojshme në zbatimin e vendimeve dhe detyrave të përcaktuara nga Këshilli Akademik;
- t'i sigurojë informata të mjaftueshme Drejtorit Akademik dhe Këshillit Akademik në lidhje me sigurimin e mjeteve dhe rezultateve në mësim, në krijimtari dhe shkathtësi sipas dispozitave të këtij Statuti;
- të përfaqësojë departamentin në Këshillin Akademik;
- të këshillojë Drejtorin Akademik dhe Këshillin Akademik për emërimin e personelit akademik për lëndët e departamentit;
- të kryejë detyra tjera të udhëheqësit të parapara me këtë Statut dhe me aktet tjera në fuqi.

2. Njësitë organizative

Neni 22

Njësitë organizative funksionojnë në kuadër të Akademisë "Evolucion" duke ofruar shërbime mbështetëse për punë mësimore, kërkimore dhe të shkathtësisë, si dhe shërbime administrative për

njësitë akademike të Akademisë "Evolucion", të cilat janë të nevojshme për përmbushjen në mënyrë efektive dhe të dobishme të përgjegjësive dhe detyrave të shkollës të parapara me këtë Statut.

Neni 23

Administrata e Akademisë "Evolucion" përbëhet nga këto Departamente:

- Burimet njerëzore (BNj) dhe përkrahja e studentëve (PS),
- Zyra për sigurimin e cilësisë,
- Departamenti i financave,
- Zyra për orientim në karrierë & Alumni, dhe
- Departamenti i përkrahjes teknike.

Në të ardhmen, sipas nevojës mund të themelohen edhe njësi tjera organizative.

Neni 24

Çdo njësi organizative udhëheqet nga përgjegjësi i saj.

Neni 25

Përgjegjësi i njësisë organizative emërohet nga Drejtori i Administratës dhe i përgjigjet atij/asaj për punën e njësisë/shërbimit.

Neni 26

Përgjegjësi i njësisë organizative ka këto detyra:

- të udhëheqë njësinë organizative për përmbushjen e objektivave nga fushëveprimi i saj;
- të përkujdeset për shfrytëzimin efikas, ekonomik dhe efektiv të mjeteve të njësisë;
- t'i raportojë rregullisht Drejtorit të Administratës për ecurinë e punës;
- të këshillojë Drejtorin e Administratës për emërimin e anëtarëve të personelit të njësisë;
- të kryejë detyra të përgjegjës të parapara me këtë Statut.

III. Organet Udhëheqëse të Akademisë "Evolucion"

Neni 27

Organet kryesore udhëheqëse të Akademisë "Evolucion" janë Bordi i Drejtorëve dhe Këshilli Akademik.

Të gjitha organet udhëheqëse të Akademisë "Evolucion" ushtrojnë aktivitetin e tyre mbi parimin e votimit me shumicë votash nëse nuk përcaktohet ndryshe me këtë Statut.

Neni 28

Drejtori Ekzekutiv është drejtues kryesor akademik e administrativ dhe përgjegjës për udhëheqjen e Akademisë "Evolucion". Në kuadër të detyrave të tij, Drejtori Ekzekutiv i përgjigjet Bordit të Drejtorëve të Akademisë "Evolucion" për punë efektive, të frytshme dhe ekonomike të Akademisë "Evolucion". Drejtorin Ekzekutiv e ndihmon Drejtori Akademik dhe Drejtori i Administratës i Akademisë "Evolucion", siç parashihet më tej në Statut.

1. Bordi i Drejtorëve

Neni 29

Bordi i Drejtorëve i Akademisë "Evolucion" (më tej: Bordi i Drejtorëve) është organ kryesor qeverisës i Akademisë "Evolucion".

Bordi i Drejtorëve përbëhet prej shtatë anëtarëve me të drejtë vote.

Pronarët e Akademisë "Evolucion" zgjedhin katër anëtarë të Bordit të Drejtorëve.

Drejtori Ekzekutiv i Akademisë "Evolucion" është anëtar i Bordit të Drejtorëve me të drejtë vote. Këshilli Akademik zgjedh një anëtar të Bordit të Drejtorëve me të drejtë vote nga personeli akademik i Akademisë "Evolucion".

Parlamenti i studentëve zgjedh dy anëtarë të Bordit të Drejtorëve me të drejtë vote radhët e studentëve aktivë të Akademisë "Evolucion".

Drejtori i Administratës është anëtar ex-officio i Bordit të Drejtorëve pa të drejtë vote.

Neni 30

Kryesuesi i Bordit të Drejtorëve zgjedhet me shumicë votash nga radha e anëtarëve të zgjedhur të Akademisë "Evolucion". Kryesuesi ka zëvendëskryesuesin.

Mandati i anëtarëve të Bordit të Drejtorëve zgjatë dy vjet me mundësi vazhdimi.

Për mbajtjen e mbledhjeve të Bordit të Drejtorëve nevojitet kuorumi prej pesë anëtarëve.

Vendimet e Bordit të Drejtorëve merren me shumicë të votave të të gjithë anëtarëve të pranishëm në mbledhje. Në rast se numri i votave është i barabartë, mbizotëron vota e kryesuesit.

Neni 31

Bordi i Drejtorëve ka këto përgjegjësi:

- miraton karakterin akademik dhe misionin e Akademisë "Evolucion", të propozuar nga Këshilli Akademik apo në konsultim me të, dhe sipas nevojës edhe me ekspertë-këshilltarë të jashtëm, si dhe të mbikëqyrë në vazhdimësi veprimtarinë e Shkollës;
- mbikëqyrë afarizmin e Akademisë "Evolucion" dhe shfrytëzimin e efektshëm dhe rritjen e vlerës së aseteve të saj;
- vendosë në lidhje me themelimin, shuarjen dhe ndryshimin e strukturës së brendshme të njësive akademike dhe njësive organizative në bazë të konsultave me Drejtorin Ekzekutiv, Drejtorin Akademik dhe Këshillin Akademik;
- vendosë për strukturën e përgjithshme organizative të njësive akademike, sipas propozimit të Këshillit Akademik;
- përcakton strategjinë, politikën e zhvillimit dhe të financimit të Akademisë "Evolucion";
- zgjedh Drejtorin Ekzekutiv;
- vendosë për planin e biznesit, investimet dhe blerjen e paisjeve;
- miraton llogarinë përfundimtare të Akademisë "Evolucion";
- jep pëlqimin për pranimin e punëtorëve për vende të reja të punës;
- nxjerr rregulloren e punës së Bordit të Drejtorëve;
- aprovon çmimet për regjistrimin dhe shkollimin e studentëve;
- aprovon politikën e pranimin të studentëve të rinj;
- vendosë për koston e plotë ekonomike për dhënien e shërbimeve;
- sjell vendime që kanë për qëllim shfrytëzimin e mjeteve në mënyrë të efektshme dhe të frytshme si dhe për ruajtjen e pronës së Akademisë "Evolucion";
- përcjell dhe mban evidencën e saktë të të dhënave mbi të hyrat dhe shpenzimet e Akademisë "Evolucion";
- nxjerr rregulloren për masat dhe procedurën disiplinore në Akademinë "Evolucion";

- në pajtim me këtë Statut mund të formojë komisione, të cilat do të merren me çështje të veçanta nga fushëveprimi i tij;
- vendosë për formën dhe përmbajtjen e stemës, vulës së thatë, flamurit dhe simboleve tjera;
- kryen edhe punë të tjera në pajtim me Ligjin dhe më këtë Statut.

2. Këshilli Akademik i Akademisë “Evolucion”

Neni 32

Këshilli Akademik i Akademisë “Evolucion” (më tej: Këshilli Akademik) është organ, i cili vendosë për çështjet më të rëndësishme të Akademisë “Evolucion” në fushën e mësimit, krijimtarisë e shkathtësisë.

Këshillin Akademik e përbëjnë;

- Drejtori Ekzekutiv;
- Drejtori Akademik;
- Udhëheqësit e të gjitha njësive akademike sipas këtij Statuti;
- një përfaqësues i mësimdhënësve;
- dy përfaqësues të studentëve;

Drejtori i Administratës i Akademisë “Evolucion” është anëtar i përhershëm i Këshillit Akademik pa të drejtë vote.

Neni 33

Këshillin Akademik e kryeson Drejtori Akademik. Në raste të veçanta, në mungesë të Drejtorit Akademik, Këshillin Akademik mund ta kryesojë anëtari i autorizuar nga Drejtori Akademik.

Neni 34

Këshilli Akademik nxjerr rregulloren e punës së tij dhe rregulloren për procedurën e zgjedhjes së anëtarit në cilësinë e përfaqësuesit të studentëve. Drejtori Akademik cakton procedurat për mbledhjet e Këshillit Akademik dhe të komisioneve të tij.

Neni 35

Këshilli Akademik është përgjegjës:

- për çështjet e përgjithshme strategjike që lidhen me studimet dhe procesin e mësimdhënies në Akademinë "Evolucion";
- për zhvillimin e strategjisë së aktiviteteve në Akademinë "Evolucion" dhe për mjetet e nevojshme për t'i mbështetur ato si dhe ofrimin e këshillave për Drejtorin Ekzekutiv dhe Bordin e Drejtorëve;
- i propozon Bordit të Drejtorëve Statutin e Akademisë "Evolucion" për miratim;
- zgjedh anëtarët e Bordit të Drejtorëve nga radhët e veta;
- vendosë për veprimtarinë mësimore, shkencore dhe artistike të Akademisë "Evolucion";
- propozon lartësinë e pagesave nga neni 31 i këtij Statuti;
- cakton kriteret e pranimit të studentëve;
- përkujdeset për sigurimin e cilësisë në bashkëpunim me Komisionin për sigurimin e cilësisë dhe përcakton procedurën e dhënies së kualifikimeve;
- propozon formën dhe përmbajtjen e stemës, vulës dhe vulës së thatë;
- miraton rregulloren mbi procedurën për shqyrtimin e masave ndaj studentëve;
- shqyrton çështjet e mbrojtjes së të drejtave të personelit dhe të studentëve;
- zbaton procedurën e zgjedhjes së personelit akademik në bazë të Statutit;
- shqyrton çështjet me kërkesë të parlamentit të studentëve;
- miraton ose kthen për përmirësim propozimet e planeve mësimore nga departamentet përkatëse dhe siguron që planet mësimore të jenë gati para se të fillojë viti akademik;
- kryen edhe punë të tjera të caktuara me këtë Statut.

Neni 36

Këshilli Akademik mund të formojë këshilla ose komisione të përkohshme për të këshilluar atë lidhur me aspekte të veçanta të punës së tij.

Këshilli Akademik ka një komision të përhershëm, të quajtur Komisioni për Sigurimin e Cilësisë.

3. Këshilli i Sigurimit të Cilësisë i Akademisë "Evolucion"

Neni 37

Këshilli i Sigurimit të Cilësisë në Akademinë "Evolucion" është përgjegjës për rishikimin dhe zhvillimin e proceseve të sigurimit të cilësisë në të gjithë institucionin, implementimi i të cilave monitorohet nga Zyra e Sigurimit të Cilësisë së Akademisë "Evolucion".

Objektivi kryesor i Këshilli i Sigurimit të Cilësisë është që të sigurojë që me përpikshmëri të implementohen politikat, proceset dhe procedurat e përcaktuara në Rregulloren e Sigurimit të Cilësisë së Akademisë "Evolucion".

Këshilli i Sigurimit të Cilësisë përbëhet nga pesë anëtarë

- dy anëtarë propozohen nga Këshilli Akademik,
- dy anëtarët tjerë propozohen nga Dejtori Ekzekutiv dhe
- një anëtar përfaqëson Këshillin Studentor.

Anëtarët që propozohen nga Këshilli Akademik mund të vijnë nga radhët e stafit akademik, stafit hulumtues, personelit administrativ dhe praktikantëve të industrisë.

4. Këshilli Studentor

Neni 38

Këshilli i studentëve është organizëm i pavarur i studentëve të Akademisë "Evolucion, i zgjedhur në mënyrë demokratike nga vetë studentët dhe përfaqëson interesat e tyre.

Ai realizon dhe mundëson pjesëmarrjen e studentëve dhe koordinon përfaqësimin e tyre në organet drejtuese të Akademisë "Evolucion", në strukturat mësimore dhe të shërbimeve.

Këshilli i studentëve shpreh mendime dhe propozime për probleme me interes të përgjithshëm të Akademisë "Evolucion", si për planet dhe programet e studimeve, rregulloret për veprimtaritë mësimore, të drejtën për të studiuar, cilësinë e shërbimeve, zhvillimin e veprimtarive të ndryshme kulturore, artistike, etj.

Këshilli i studentëve zgjidhet çdo 2 (dy) vjet nga votat e studentëve, dhe përbëhet nga një përfaqësues për çdo program studimi dhe vit studimi.

5. Drejtori Ekzekutiv i Akademisë "Evolucion"

Neni 39

Drejtori Ekzekutiv është drejtues kryesor i Akademisë "Evolucion".

Drejtori Ekzekutiv organizon dhe drejton punën dhe veprimtarinë e Akademisë "Evolucion" dhe është përgjegjës për punën efektive e të rregullt të Akademisë "Evolucion" si dhe për menaxhimin e saj në suaza të politikës së përcaktuar nga Bordi i Drejtorëve.

Neni 40

Drejtori Ekzekutiv i Akademisë "Evolucion" ka këto detyra dhe përgjegjësi :

- organizon, drejton dhe menaxhon Akademinë "Evolucion";
- vepron në emër të Akademisë "Evolucion" dhe e përfaqëson atë;
- drejton dhe zhvillon gjithë punën mësimore e shkencore-artistike në Akademinë "Evolucion";
- siguron shfrytëzimin efikas, ekonomik dhe të dobishëm të mjeteve të Akademisë "Evolucion";
- përpilon raportin vjetor të buxhetit për të hyrat dhe shpenzimet për vlerësim dhe miratim nga Bordi i Drejtorëve;
- organizon konkurset e pranimeve të studentëve të rinjë në Akademinë "Evolucion" dhe të mbikqyrë komisionin e pranimeve;
- zbaton vendimet e Bordit të Drejtorëve;
- emëron personelin ndihmës mësimor, administrativ dhe teknik dhe nënshkruan kontratat e tyre të punës;
- nënshkruan kontratat e aktivizimit të personelit të jashtëm mësimor;
- shpallë fituesit e konkurseve të pranimit;
- kryen të gjitha detyrat e tjera në emër të Akademisë "Evolucion", siç janë përcaktuar me këtë Statut dhe rregulloret e tjera në fuqi.

Neni 41

Drejtorin Ekzekutiv e zgjedh Bordi i Drejtorëve.

Neni 42

Drejtori Ekzekutiv emërohet për një periudhë dyvjeçare me mundësi vazhdimi.

Neni 43

Mandati i Drejtorit Ekzekutiv mund të përfundojë para kohe në rast të:

- dorëheqjes;
- shkarkimit nga detyra;
- arsyeve shëndetësore;
- dënimit për vepër penale;
- vdekjes.

Neni 44

Drejtori Ekzekutiv mund të formojë komisione këshilldhënëse të përkohshme për të përgatitur punët e caktuara nga fushëveprimi i vet.

Neni 45

Vendimin për shkarkimin e Drejtorit Ekzekutiv e merr Bordi i Drejtorëve me shumicën e votave të numrit të përgjithshëm të anëtarëve të vet.

6. Drejtori Akademik i Akademisë "Evolucion"

Neni 46

Drejtori Akademik është drejtues kryesor akademik i Akademisë "Evolucion".
Drejtori Akademik organizon dhe drejton veprimtarinë akademike të Akademisë "Evolucion" dhe është përgjegjës për aktivitetet akademike, kërkimore dhe kreative në Akademinë "Evolucion".

Neni 47

Drejtori Akademik i Akademisë "Evolucion" ka këto detyra dhe përgjegjësi :

- organizon, drejton dhe menaxhon aktivitetet akademike të Akademisë "Evolucion";
- mbikqyrë punën mësimore e shkencore-artistike në Akademinë "Evolucion";
- organizon konkurset e pranimeve të studentëve të rinj në Akademinë "Evolucion" dhe mbikqyrë komisionin e pranimeve;
- shpallë fituesit e konkurseve të pranimit;
- kryen të gjitha detyrat e tjera në emër të Akademisë "Evolucion", siç janë përcaktuar me këtë Statut dhe rregulloret e tjera në fuqi.

Neni 48

Drejtorin Akademik e zgjedh Bordi i Drejtorëve.

Neni 49

Drejtori Akademik emërohet për një periudhë dyvjeçare me mundësi vazhdimi.

Neni 50

Mandati i Drejtorit Akademik mund të përfundojë para kohe në rast të:

- dorëheqjes;
- shkarkimit nga detyra;
- arësyeve shëndetësore;
- dënimit për vepër penale;
- vdekjes.

Neni 51

Drejtori Akademik mund të formojë komisione këshilldhënëse të përkohshme për të përgatitur punët e caktuara nga fushëveprimi i vet.

Neni 52

Vendimin për shkarkimin e Drejtorit Akademik e merr Bordi i Drejtorëve me shumicën e votave të numrit të përgjithshëm të anëtarëve të vet.

7. Drejtori i Administratës i Akademisë “Evolucion”

Neni 53

Drejtori i Administratës është zyrtar i lartë ekzekutiv dhe administrativ i Akademisë “Evolucion”. Drejtori i Administratës përgjigjet Drejtorit Ekzekutiv për administrim efikas, ekonomik dhe efektiv në të gjitha nivelet e Akademisë “Evolucion”.

Drejtori i Administratës zgjidhet nga Bordi i Drejtorëve me shumicën votave të anëtarëve të pranishëm, sipas propozimit të Drejtorit Ekzekutiv, në bazë të konkursit publik.

Kandidatët që konkurojnë për postin e Drejtorit të Administratës të Akademisë “Evolucion” duhet të kenë diplomë universitare dhe përvojë pune në punët e ngjajshme.

Neni 54

Drejtori i Administratës i Akademisë “Evolucion” ka këto detyra dhe përgjegjësi:

- është zyrtari më i lartë i administratës së Akademisë “Evolucion”;
- është zyrtar përgjegjës për udhëheqje efikase, ekonomike dhe efektive të Akademisë “Evolucion”;
- është përgjegjës për përgatitje teknike të procesit buxhetor;
- është përgjegjës për koordinimin e punës së Komisionit për sigurimin e Cilësisë;
- është përgjegjës për menaxhimin e objektit dhe orarit të mësimit;
- është përgjegjës për mbajtjen e evidencës së rregullt për kandidatët që paraqiten për praninë; studentët e regjistruar në të gjitha drejtimet e Akademisë “Evolucion”; të diplomuarit, personelin me kontratë; pronën; ndërmarrjen e masave për përparimin e punës së shërbimeve të administratës së Akademisë “Evolucion”; dhënien e mendimeve dhe përgatitjen e akteve të përgjithshme të Akademisë “Evolucion” dhe të departamenteve;
- koordinon aktivitetet e marketingut të shkollës në bashkëpunim me stafin tjetër;
- kryen edhe punë të tjera të parapara me këtë Statut dhe ligj.

IV. Staf i akademik dhe joakademik

Neni 55

Të gjitha vendet e punës në Akademinë "Evolucion" bazohen në kontratat me normë të plotë dhe kontratat me gjysmënormë.

1. Staf akademik

Neni 56

Në Akademinë "Evolucion" veprimtarinë mësimore, shkencore dhe profesionale e zhvillon personeli akademik.

1.1. Thirrjet dhe procedura e zgjedhjes së personelit akademik

Neni 57

Përsonei akademik përbëhet nga:

1. Mësimdhënësit e rregullt;
2. Mësimdhënësit bashkëpunëtorë (të jashtëm);
3. Asistentët;

Neni 58

Zgjedhja e personelit akademik bëhet në mënyrë transparente në bazë të konkursit publik. Konkursin për zgjedhje të personelit akademik e shpallë Bordi i Drejtorëve në bazë të propozimeve të udhëheqësve të departamenteve dhe Këshillit Akademik.

Neni 59

Pas mbylljes së konkursit, Këshilli Akademik formon komisionin profesional prej së paku tre anëtarësh për propozimin për zgjedhje në thirrje të caktuar.

Anëtar i komisionit profesional nuk mund të jetë personi, i cili është bashkëshort, partner ose anëtar i familjes së ngushtë të kandidatit që duhet të zgjidhet.

Këshilli Akademik përcakton propozimin për një nga kandidatët, i cili i plotëson më së miri kushtet dhe kriteret e përcaktuara në konkurs për zgjedhje. Propozimi për zgjedhjen e personelit akademik i dërgohet Bordit të Drejtorëve, i cili bën zgjedhjen, ndërsa Drejtori Ekzekutiv lidhë kontratën në bazë të dispozitave ligjore për punë për periudhën për të cilën kandidati është zgjedhur.

Zgjedhjen e bashkëpunëtorëve e bën Këshilli Akademik, ndërsa kontratën e punës e lidhë Drejtori Ekzekutiv në bazë të dispozitave ligjore në fuqi për periudhën për të cilën është zgjedhur.

Neni 60

Kriter për zgjedhjen dhe avancimin e çfarëdo titulli të personelit akademik janë kualifikimet përkatëse dhe përvojat relevante për vendin e punës.

Neni 61

Zgjedhja në thirrje mësimore bëhet në kohëzgjatje prej tri vitesh. Ajo mund të përsëritet me rekomandimin e Këshillit Akademik.

1.2. Lidhja dhe shkëputja e kontratës me personelin akademik

Neni 62

Personeli akademik konsiderohet i punësuar në Akademinë "Evolucion", pasi të jetë kryer procedura e zgjedhjes, me nënshkrimin e kontratës së punës me Drejtorin Ekzekutiv të Akademisë "Evolucion", në bazë të Ligjit të Punës në fuqi, kontratës kolektive dhe këtij Statuti.

Neni 63

Kontrata e punës me personelin akademik mund të ndërpritet para kohe në rast:

- dorëhëqjes me shkrim të personelit akademik sipas procedurës dhe afatit të paraparë me kontratën e punësimit;
- dënimi për vepër penale, me të cilën cenohet imazhi i Akademisë "Evolucion", sipas procedurës së përcaktuar me rregullore të veçantë të Akademisë "Evolucion";
- të shkeljes së rëndë të Kodit të Etikës së personelit akademik, në bazë të procedurës së parashikuar me atë kod;
- të paaftësisë për të ushtruar detyrën për shkaqe fizike ose mentale, të dëshmuar me raport të mjekut;
- se me sjellje të tij/saj e cenon rendin, autoritetin dhe dinjitetin e Akademisë "Evolucion", sipas procedurës së parashikuar me rregullore të veçantë;
- për sjellje ose vepër korruptive, të përcaktuar sipas procedurës së parashikuar me rregullore dhe ligj.

1.3. Procedura disiplinore

Neni 64

Personeli akademik i Akademisë "Evolucion", në punën, veprimtarinë dhe sjelljet e veta duhet t'i përshtatet parimeve morale dhe etike, parimeve të së vërtetës shkencore dhe artistike dhe ta mbrojë autoritetin e Akademisë "Evolucion" në mënyrën e paraparë me etikën e personelit akademik.

Neni 65

Cenimi i rregullave të sjelljes dhe mos kryerja e obligimeve të përcaktuara me këtë Statut, me Kodin e Etikës dhe me aktet e tjera të Akademisë "Evolucion" nga personeli akademik dhe nga personat tjerë të punësuar në Akademinë "Evolucion", tërheq përgjegjësinë disiplinore.

Procedura disiplinore përcaktohet me Rregulloren mbi procedurën disiplinore të Akademisë "Evolucion", të cilën e nxjerr Këshilli Akademik në pajtim me ligjin, në pajtim me këtë Statut, me kodin e mirësjelljes dhe akteve të tjera të Akademisë "Evolucion".

2. Stafi joakademik

Neni 66

Në personelin joakademik të Akademisë "Evolucion" bëjnë pjesë personat që angazhohen për:

1. Detyra udhëheqëse dhe profesionale;
2. Administratë;
3. Punë teknike.

Përgjegjësitë dhe kualifikimet e veçanta për çdo pozicion përcaktohen me përshkrimin e punës të caktuar nga Drejtori Ekzekutiv me propozimin e Drejtorit të Administratës ose nga përgjegjësi i njësisë akademike apo organizative.

V. Studentët dhe organizimi i studentëve

Neni 67

Student i Akademisë "Evolucion" është personi i regjistruar në Akademinë "Evolucion", i cili i plotëson detyrimet e veta akademike dhe financiare në pajtim me Ligjin mbi Arsimin e Lartë, aktet tjera juridike të MASHT si dhe aktet e përgjithshme të Akademisë "Evolucion".

Statusin e vet studenti e dëshmon me indeks ose me dokument tjetër të parashikuar me aktet e përgjithshme të Akademisë "Evolucion".

Neni 68

Studenti duhet t'i plotësojë detyrimet e veta akademike dhe financiare të parapara me ligj, me këtë statut dhe me akte tjera të përgjithshme.

Neni 69

Studimet mund të vijohen në mënyrë të rregullt, ashtu siç parashihet me Statutin e Akademisë "Evolucion" dhe me rregulloren e tij.

1. Regjistrimi në studime

Neni 70

Pranimi në studime në Akademinë "Evolucion" bëhet në bazë të konkursit publik, në bazë të procedurës përzgjedhëse dhe kritereve të vlerësimit të përcaktuara nga Këshilli Akademik.

Neni 71

Vendimin për shpalljen e konkursit për pranim të studentëve e merr Këshilli Akademik me propozimin e departamenteve përkatëse.

Neni 72

Studenti fiton të drejtën e regjistrimit në vitin më të lartë të studimeve në qoftë se i kryen të gjitha detyrimet e përcaktuara me planin dhe programin mësimor, Rregulloren mbi studimet dhe aktet tjera të përgjithshme.

Studenti mund të regjistrojë sërish të njëjtin vit të studimeve sipas kushteve të përcaktuara me Rregulloren mbi studimet, pas përmbushjes së detyrimet financiare ndaj Akademisë "Evolucion".

Neni 73

Studenti duhet t'i mbarojë studimet themelore akademike brenda periudhës kohore që nuk tejkalon dyfishin e periudhes normale të paraparë për studimet, të cilat i ka regjistruar. Përkjashtim bëjnë rastet e veçanta, për të cilat vendosë Këshilli Akademik.

Neni 74

Studenti humb statusin e studentit:

- kur përfundon studimet;
- nëse çregjistrohet;
- nëse nuk regjistrohet në vitin më të lartë ose në të njëjtin vit të studimeve;
- me vendim nga procedura disiplinore;
- nëse nuk i kryen studimet në afatin e përcaktuar në pajtim me nenin paraprak të këtij Statuti;

2. Të drejtat dhe detyrimet e studentëve

Neni 75

Studentët kanë të drejtë:

- të marrin pjesë në ligjërata, seminare dhe aktivitete tjera mësimore;
- të përdorin literaturën, instalimet dhe pajisjet e Akademisë "Evolucion" për plotësimin e punës së tyre mësimore-shkencore e artistike, sipas programeve dhe rregulloreve përkatëse;
- të përdorin bibliotekën dhe mjediset tjera të Akademisë "Evolucion";
- të marrin pjesë në zgjedhjet për postet e studentëve në organizmat e ngritura në bazë të statutit dhe akteve tjera përkatëse;
- të ushtrjnë anëkesë lidhur me cilësinë e procesit të mësimdhënies ose lidhur me lokalet në të cilat mbahet mësimi;
- të drejtat të tjera të parapara me këtë Statut dhe aktet tjera të Akademisë "Evolucion".

Neni 76

Studentët kanë këto detyrime:

- të zbatojnë të gjitha detyrimet që rrjedhin nga planet mësimore;
- të zbatojnë rregullat e përcaktuara nga Akademia "Evolucion";
- të respektojnë të drejtat e personelit dhe të studentëve të tjerë;
- të ruajnë prestigjin dhe dinjitetin e Akademisë "Evolucion";
- detyrimet të tjera të parapara me këtë Statut dhe aktet e tjera të Akademisë "Evolucion".

Neni 77

Studentët kanë të drejtë të themelojnë organizata studentore, të cilave mund t'u përkasin të gjithë studentët.

Interesat e studentëve do të përfaqësohen në kuadër të Akademisë "Evolucion" me këto organe:

1. Parlamenti i studentëve në nivel të Akademisë "Evolucion";

2. Këshilli i studentëve në nivel të njësisë akademike.

Organizatat studentore kanë të drejtë të propozojnë anëtarët për parlamentin e studentëve dhe këshillat e studentëve të njësisë akademike në bazë të rezultateve të zgjedhjeve në çdo dy vjet.

Neni 78

Në rast të shkeljes së detyrimeve të studentit, kundër tij mund të ngrihet procedura disiplinore në bazë të rregullores së posaçme të Akademisë "Evolucion".

Masa më e lehtë disiplinore është vërejtja me shkrim, kurse masa më e ashpër është përjashtimi i përhershëm nga Akademia "Evolucion".

VI. Llojet e studimeve dhe kushtet për regjistrim

Neni 79

Studimet në Akademinë "Evolucion" përcaktohen në kuadër të programeve të studimeve.

Përmbajtja e programeve të studimeve për mësimdhënie përcaktohet me rregulloret e përgatitura nga komisioni akademik i departamentit përkatës dhe aprovet nga Këshilli Akademik.

Neni 80

Akademia "Evolucion" ofron këto lloje të studimeve themelore:

- a) Studime të nivelit të gjashtë (Bachelor),
- b) Studime të nivelit të shtatë (Master),
- c) Kurse të shkurtëra profesionale.

Neni 81

Studimet themelore te nivelit Bachelor 3 (tre) vjet dhe me këtë studentët fitojnë përgatitje themelore profesionale dhe marrin diplomën Bachelor nga fusha përkatëse e studimeve dhe 2 (dy) vjet ne nivelin Master dhe me këtë studentët fitojnë përgatitje të lartë profesionale dhe marrin diplomën Master nga fusha përkatëse e studimeve.

Neni 82

Kushtet për pranim në studimet themelore në Akademinë "Evolucion" janë:

- Përfundimi me sukses i shkollës së mesme në Republikën e Kosovës i vërtetuar me diplomë;
- Përfundimi me sukses i shkollës fillore dhe të mesme me së paku 12 vjet të shkollimit i vërtetuar me diplomë përkatëse;
- Autorizim i veçantë i lëshuar nga ana e MASHT.

Çdo student duhet të kalojë me sukses provimin pranues për regjistrim në vitin e parë të studimeve. Në rast kur nuk aplikohet provimi pranues por intervista dhe portofolioja artistike, atëherë për pranim vendosë paneli intervistues i përbërë nga anëtarë të deleguar të Këshillit Akademik.

VII. Planet dhe programet mësimore

Neni 83

Me planet dhe programet mësimore përcaktohen në hollësi kushtet, të cilat duhet të plotësohen për çdo lloj të studimeve.

Neni 84

Planet dhe programet mësimore i miraton Këshilli Akademik me propozim të departamenteve përkatëse.

Neni 85

Planet dhe programet mësimore përmbajnë lëndët obligative dhe zgjedhore, të cilat më hollësisht rregullohen me rregulloren e Akademisë "Evolucion".

Neni 86

Me rastin e përcaktimit të planit mësimor, Akademia "Evolucion" duhet posaçërisht të kujdeset që studimi të jetë:

- bashkëkohor dhe që i përshtatet mundësive dhe interesave të studentëve;
- në harmoni me standardet e përcaktuara nga MASHT;
- i krahasueshëm me institucionet e tjera të larta arsimore në vend dhe jasht vendit, me qëllim të ofrimit të mundësisë së bartjes së kredive në institucionet tjera arsimore brenda dhe jasht vendit sipas Sistemit European të Transferit të Kredive (ECTS).

Çdo mësimdhënës është i obliguar që të bashkëpunojë me stafin dhe udhëheqësin e departamentit përkatës në përpilimin e programit të lëndës së vet. Ky plan duhet të miratohet nga Këshilli Akademik. Pas miratimit, në fillim të vitit akademik, ky plan u shpërndahet studentëve përkatës.

Neni 87

Departamentet e Akademisë "Evolucion" në fillim të çdo viti akademik e bëjnë listën e mësimdhënësve dhe bashkëpunorëve për tërë vitin akademik sipas planit mësimor.

Neni 88

Viti akademik fillon më 15 tetor të vitit vijues dhe përfundon më 30 shtator të vitit të ardhshëm. Mësimi organizohet në dy semestra (semestri dimëror prej datës 15.tetor deri më 15. shkurt dhe semestri veror prej datës 01.mars deri më 15 qershor të vitit akademik).

VIII. Përcaktimi i suksesit akademik

Neni 89

Dija dhe shkathtësitë e fituara të studentit vlerësohen në mënyrë periodike gjatë tërë procesit të mësimit, ndërsa nota definitive përcaktohet në provimin përfundimtar nga ana e mësimdhënësit të lëndës.

Provimet mbahen në të gjitha lëndët, të cilat studenti i ka regjistruar në bazë të materies së përcaktuar me programin mësimor.

Provimit mund t'i nënshtrohet studenti i cili kryen të gjitha obligimet e përcaktuara me këtë Statut dhe me aktet e tjera të Akademisë "Evolucion".

Suksesi i arritur në provim është publik.

Neni 90

Suksesi i studentit shprehet me nota prej 5 (pesë) deri në 10 (dhjetë).

Nota 5 (pesë) shprehë suksesin e pamjaftueshëm dhe për të mbahet evidencë e posaçme.

Neni 91

Afatet e provimeve janë:

Afatet e rregullta: afati i janarit, qeshorit dhe ai i shtatorit.

Këto afate janë fikse dhe orari i tyre publikohet në fillim të çdo viti.

Afat i jashtëzakonshëm është afati i prillit, ndërsa për absolventët është edhe afati i nëntorit.

Dispozitat me detaje lidhur me provimet përcaktohen me rregulloren e veçantë të Akademisë "Evolucion"

IX. Titujt profesionalë dhe diplomat

Neni 92

Sipas kushteve për akreditim të parapara me ligj, Akademia "Evolucion" jep këta tituj profesionalë dhe këto diploma:

- diplomë për studime themelore Bachelor (BA).
- diplomë për studime të larta Master (MA).

Neni 93

Vlerësimi për studime themelore Bachelor dhe Master bëhet sipas sistemit Evropian të Transferit të Kredive (ECTS) në të gjitha departamentet e Akademisë "Evolucion". Studentëve i'u mundësohet bartja e kredive nga Akademia "Evolucion" në institucionet e tjera brenda vendit dhe jashtë tij.

Neni 94

Studentëve do t'u njihen kreditë e fituara edhe në kurset e akredituara nga ministrinë përkatëse. Në marrëveshje me stafin akademik të Akademisë "Evolucion", studentët kanë të drejtë të ndjekin lëndë të veçanta edhe në institucionet të tjera publike dhe private të nivelit ekuivalent të licencuara nga MASHT dhe të akredituara nga Agjencioni i Akreditimit i Kosovës.

Neni 95

Diploma Bachelor jepet pas përfundimit të studimeve themelore akademike trevjeçare.

Neni 96

Të gjitha programet e studimeve themelore trevjeçare të Akademisë "Evolucion" përfundojnë me punimin e diplomës (disertacionit ose projektit final) për nivelin Bachelor ose me provim para komisionit në pajtim me programet e tyre të studimeve.

Punimi i diplomës (disertacionit ose projektit final) për nivelin Bachelor elaborohet individualisht nga studenti duke vërtetuar se aftësitë teorike të arritura gjatë kohës së studimit mund të shfrytëzohen me sukses për zgjidhjen e problemeve praktike në fushat e caktuara.

Punimi i diplomës (disertacioni ose projekti final) për nivelin Bachelor mund të elaborohet bashkë nga dy ose tre studentë (grup hulumtues) dhe aty duhet të shënohet kontributi i secilit kandidat.

Neni 97

Diploma Master jepet pas përfundimit të studimeve të larta akademike dyvjeçare të nivelit Master.

Neni 98

Të gjitha programet e studimeve të larta dyvjeçare të nivelit Master të Akademisë "Evolucion" përfundojnë me punimin e diplomës (disertacionit ose projektit final) për nivelin Master ose me provim para komisionit në pajtim me programet e tyre të studimeve.

Punimi i diplomës (disertacionit ose projektit final) për nivelin Master elaborohet individualisht nga studenti duke vërtetuar se aftësitë teorike të arritura gjatë kohës së studimit mund të shfrytëzohen me sukses për zgjidhjen e problemeve praktike në fushat e caktuara.

Punimi i diplomës (disertacioni ose projekti final) për nivelin Master mund të elaborohet bashkë nga dy ose tre studentë (grup hulumtues) dhe aty duhet të shënohet kontributi i secilit kandidat.

Neni 99

Mënyra, kushtet dhe procedura e provimit përcaktohen me rregullore të Akademisë "Evolucion".

X. Kontrolli i cilësisë dhe vetëvlerësimi

Neni 100

Akademia "Evolucion" kontrollon dhe zhvillon sistemin e vet të sigurimit të cilësisë së mësimdhënies dhe aktiviteteve krijuese dhe artistike. Kontrollit dhe vlerësimit të cilësisë i nënshtrohet çdo segment i punës së Akademisë dhe ka për detyrë analizimin efikas të funksionimit të saj.

Neni 101

Puna e të gjithë personelit akademik dhe stafit profesional i nënshtrohet vlerësimit të vazhdueshëm. Vërtetimi dhe vlerësimi i rregullt i punës mësimore të mësimdhënësve, bashkëpunëtorëve dhe stafit profesional në Shkollë bëhet një herë në vit. Vlerësimet e brendshme përmes vlerësimit vetanak realizohen në këtë mënyrë:

- a) përmes pyetësorëve dhe vetëvlerësimit nga ana e personelit akademik;
- b) përmes pyetësorëve anonimë të vlerësimit nga studentët;
- c) përmes analizës së parametrave të bazuar në raportet të punës dhe përmbushjes së detyrave, me ndihmën e të cilave njësjive të kontrolluara iu përcaktohen masat që duhet marrë për ruajtjen dhe përmirësimin e cilësisë.

Neni 102

Vlerësimet udhëhiqen në përputhje me standardet ndërkombëtare të vlerësimit. Përmes këtyre anketave secili student mund të vlerësojë punën e mësimit të vet ku parashihen: fushat e vlerësimit, objektivat, procedurat, oraret dhe instrumentet. Vlerësimet kanë këto efekte:

1. motivimin dhe vlerësimin publik në rast të rezultateve pozitive,
2. zbatimin e masave të përshtatshme me qëllim të përmirësimit të punës në rast të rezultateve negative.

Pas përfundimit të çdo vlerësimi përgatitet raporti me shkrim lidhur me procedurën e vlerësimit, rezultatet dhe masat e propozuara.

XI. Financimi

Neni 103

Akademia "Evolucion" në përputhje me dispozitat e këtij Statuti siguron mjete financiare nga këto burime:

- nga tarifat e shkollimit, tarifat administrative dhe pagesat tjera që i bëjnë studentët;
- nga pagesat për shërbimet komerciale dhe shërbime tjera;
- nga fondet e Ministrisë dhe buxhetit të Republikës së Kosovës për mësimdhënie dhe kërkime shkencore-artistike me interes të përgjithshëm;
- nga donacionet, dhuratat dhe ndihmat;
- shfytëzimi i pronësisë intelektuale të Akademisë "Evolucion";
- nga kontratat me organizatat kombëtare, ndërkombëtare, publike ose private në fushën e mësimdhënies, kërkimeve shkencore, artistike;
- çdo lloj burimi tjetër i lejuar nga ligjet në fuqi të Kosovës.

Neni 104

Akademia "Evolucion" ka llogarinë rrjedhëse.

Mjetet e realizuara nga neni paraprak i këtij Statuti derdhen në llogarinë rrjedhëse të Akademisë "Evolucion".

Neni 105

Metodologjia e financimit, kushtet e tij dhe kontrolli financiar përcaktohen më hollësisht me rregulloren e Akademisë "Evolucion".

XII. Dispozitat kalimtare dhe përfundimtare

Neni 106

Rregulloret e veçanta të Akademisë "Evolucion" dhe aktet tjera të të organeve të saj hartohen në pajtim me ligjet në fuqi dhe me këtë Statut.

Neni 107

Statuti i Akademisë "Evolucion" mund të ndryshohet sipas procedurës së miratimit të tij.

